



Communicaziun a las medias

Emprima badigliada per il nov edificzi complementar da la mensa e da la mediateca per la scola chantunala grischuna

L'emprima badigliada per il nov edificzi complementar da la mensa e da la mediateca sco er per ils locals per la protecziun dals bains culturals da l'uffizi da cultura dal Grischun è vegnida fatga oz. Las lavurs da construcziun duran circa 2 onns, la retratga dal nov edificzi complementar è planisada per il december 2017.

L'edificzi complementar al Münzweg a Cuira è il punct final da la renovaziun totala currenta da la scola chantunala grischuna a Cuira. La construcziun da la mensa e da la mediateca cumplettescha l'infrastructura da la scola chantunala grischuna ch'è vegnida sanada ed adattada pass per pass dapi l'onn 2006 ad in manaschi modern. En l'edificzi vegnan ultra da quai integrads locals per la protecziun dals bains culturals per la biblioteca chantunala e per l'archiv dal stadi dal Grischun.

Realisà vegn il project "DENYS" da l'architect Andreas Senn da Son Gagl ch'è vegnì erui a chaschun d'ina concorrenza l'onn 2011. L'edificzi complementar vegn costruì tenor il standard Minergie-P-ECO ed ha in implant da fotovoltaica sin il tetg plat. Cun l'implant po vegnir producida per onn bundant 46 000 kWh electricitad. Quai correspunda a circa 40 pertschient dal consum d'electricitad da l'edificzi complementar.

A chaschun da las exchavaziuns d'in onn en il mulin da munaidas vegl ha il servetsch archeologic dal Grischun pudì render visibla l'istorgia da passa 400 onns da quest edificzi. Ins ha chattà utensils da la producziun da munaida sco chazzettas (recipients resistents al feu per preparar il metal da munaida), munaida nunelavurada (talers dal 18. tschientaner), restanzas da la producziun (parts d'argient da la producziun da munaida) sco er cheramica da diever e ruments chasans.

Suenter ina planisaziun d'execuziun intensiva po quest atun vegnir stgavà il foss da construcziun e las lavurs da construcziun pon vegnir prendidas per mauns entaifer il termin fixà. Ils mirs da l'edificzi complementar vegnan ad esser construids probablamain la fin da l'onn 2016 ed il termin da la retratga è fixà per il december 2017.

Infurmaziuns:

dr. Mario Cavigelli, schef dal departament da construcziun, traffic e selvicultura, tel. 081 257 36 01,

e-mail: Mario.Cavigelli@bvfd.gr.ch

Markus Dünner, architect chantunal, uffizi da construcziun auta, tel. 081 257 36 31,

e-mail: Markus.Duenner@hba.gr.ch

Gremi: uffizi da construcziun auta dal Grischun
Funtauna: rg uffizi da construcziun auta dal Grischun
Data: 06-10-2015

Agiuntas:

- fatschada ost
- fatschada vest
- fatschada nord